

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. मुखमंत्री ओमर अब्दुल्ला होंरें अज्ज गुलमर्ग च अपने मंत्रिएं ते प्रशासनिक सचिवें दी इक बैठक दी प्रधानता कीती।
2. उपमुखमंत्री सुरिंदर चौधरी होंरें आखेआ ऐ जे पूरा जम्मू-कश्मीर, आतंकवाद खलाफ पूरी तगडेयाई कन्नै खड़ोते दा ऐ। उ'नें आखेआ जे सैलसफा च नमें सिरेया जान भरना, उ'दी पैहली प्राथमिकता ऐ।
3. पाकिस्तान दे बन्ने कन्नै लगदे जिलें च कल सिविल डिफेंस अभ्यास यानि मॉक ड्रिल आयोजित कीता जाहग।
4. बन्ने आहले जिलें च मुकामी बसनीकें दी सुरक्षा जकीनी बनाने दे अपने अभियान तैहत फौजें पुंछ च कब्ज़ा रेखा दे नेड़े कलसियां ग्रां च मोर्टर दे जींदे शैल गी नकारा कीता ऐ।
5. खशबूदार बूहटें दी रड़ ते बैंगनी क्रांति गी बढ़ावा देने दे मकसद कन्नै औंदी पैहली ते 2 जून गी भद्रवाह च लवेंडर फेस्टिवल 2025 दा आयोजन कीता जाहग।

<><><><><><>

CM-Meeting

खिते च रमानदारी ब्हाल करने दे जतनें गी बरोबर जारी रक्खदे होई मुखमंत्री ओमर अब्दुल्ला होंरें अज्ज गुलमर्ग च अपने मंत्रिएं ते प्रशासनिक सचिवें दी इक बैठक दी प्रधानता कीती। इस बैठक दा मकसद, लोकें दे दिलें चा डर दी भावना गी कड़ना, सुरक्षा ते विश्वास दी भावना गी परतियै ब्हाल करना ते घाटी च सैलसफा ते आर्थिक गतिविधिं च नमें सिरेया जान भरना ऐ। इस मौके पर मीडियाकर्मिएं कन्नै गल्ल करदे होई मुखमंत्री होंरें आखेआ जे जम्मू-कश्मीर च रमानदारी ब्हाल करने ते आर्थिक गतिविधिं च नमें सिरेया जान भरने लेई लगातार जतन कीते जा' रदे न। ओमर होंरें आखेआ

मुखमंत्री होंरें औंदे ईद-उल-अज़हा दे ध्यार सने, माता खीर भवानी मेले, श्री अमरनाथ दी जी सलाना जातरा ते मुहर्रम दिएं तैयारिएं दा बी जायजा लैता।

<><><><><><>

Dy. CM

उपमुख्यमंत्री सुरिंदर चौधरी होरें अज्ज आखेआ ऐ जे जम्मू-कश्मीर, आतंकवाद दे खलाफ पूरी तगडेयाई कन्नै ते बिजन कुसै डर-त्राह दे खड़ोते दा ऐ। उ'नें आखेआ जे आतंकवादिएं आसेआ बुज़दिलाना हिंसक कार्रवाईयां खिते दे मजबूत धेड़ये जां रमानदारी गी कमजोर नेई करी सकदिआं। रमानदारी गी ब्हाल करने दे महत्वै पर जोर पांदे होई उपमुख्यमंत्री होरें आखेआ जे आर्थिक गतिविधिएं च नमें सिरेया जान भरने लेई सैलसफा दा विकास अत लाज़मी ऐ। उ'नें जम्मू-कश्मीर गी, सुरक्षित, शांतिपूर्ण ते गर्मजोशी कन्नै सैलानिएं दे सोआगत आहली थाह बनाने दे सरकार दे धेड़ये गी फही पक्का कीता। इस मौके पर मीडियाकर्मिएं कन्नै गल्ल करदे होई उपमुख्यमंत्री सुरिंदर चौधरी होरें आखेआ

<><><><><><>

Mock-Drills

पाकिस्तान दे बन्ने कन्नै लगदे जिलें च कल सिविल डिफेंस अभ्यास यानि मॉक ड्रिल आयोजित कीता जाहग। एह अभ्यास गुजरात, राजस्थान, पंजाब ते जम्मू-कश्मीर च होग। इस दरान, सरबंघत अधिकारी, लोकें गी एमरजेन्सी ज्नेय हालात कन्नै निब्वड़ने लेई लोड़चदे कौशल कन्नै लैस करने दे मकसद कन्नै प्रदर्शन ते सिखलाई आहले सत्र लोआडन। बक्ख-बक्ख धार्मिक संगठनें, सरकारी मैहकमें, राश्ट्री कैडेट कोर - एनसीसी कैडेटें ते राश्ट्री सेवा योजना - एनएसएस स्वयंसेवक इस अभ्यास च हिस्सा लैडन।

<><><><><><>

APD-Reaction

पहलगाम आतंकवादी हमले ते आपरेशन सिंदूर दे बाद आतंकवाद गी बिंद बी बर्दाश्त नेई करने दे भारत दे संदेस गी दुनिया भरै च पुजाने आहली इक महत्वपूर्ण कूटनीतिक गैह दे तैहत सब्भनें पार्टिएं दे सदस्ये आहले संसदी डेलीगेशन बक्ख-बक्ख मुल्खें च दौरै लाऽ करदे न। उं' दे ऐकड़े दौरें दा मकसद आतंकवाद खलाफ आलमी सतह उप्पर सैहयोग हासल करना ते रमानदारी ते सुरक्षा दे प्रति भारत दी वचनबद्धता गी उजागर करना ऐ। जम्मू-कश्मीर दे लोकें इस पैहलकदमी दा सोआगत करदे होई एह मेद बी बुज्झी ऐ जे एह गैह, आलमी बिरादरी दा ध्यान, बन्ने पारा आहले आतंकवाद बक्खी खिच्योग ते एहदे' नै आतंकवाद दे पीड़ित लोकें गी न्याऽ दोआने ते इलाकाई स्थिरता बरकरार रक्खने दे भारत दे जतनें गी बल मिलोग। इस सरबंघे च आकाशवाणी समाचार कन्नै गल्ल करदे होई इक मुकामी बसनीक नै आखेआ

<><><><><><>

Salal-Dam Open

जिला प्रशासन रियासी नै आम जनता लेई जानकारी दिती ऐ जे पानी दे रूटीन नियमन तैहत सलाल डैम दे कई गेट खोल्ली दिते गेदे न जेदे कारण चिनाह् दरेआ च पानी दा स्तर बधी सकदा ऐ। लोकें गी सलाह दिती जंदी ऐ जे ओह् दरेआ दे कंडे ते होरनें हेठले इलाकें च नेई जान। लोकें गी हिदायत दिती गेदी ऐ जे ओह् अगले हुकमै तोड़ी इनें इलाकें च आपूं जाने जां अपने माल बच्छे गी लेने थमां गुरेज करन।

<><><><><><>

Mortar Shell Poonch

बन्ने आहले जिले पुंछ च कब्ज़ा रेखा दे नेड़े कलसियां ग्रांs च जामिया मसीत दे नेड़े फौजै, मोर्तार दे जींदे शैल गी नकारा कीता ऐ। मुकामी लोकें मूजब, आपरेशन सिंदूर दे दरान भारत आसेआ कीती गेदी कार्रवाई दे मगरा पाकिस्तान आसेआ सिविल इलाकें पर कीती गेदी गोलाबारी दे दरान एह् शैल दागेया गेआ हा। आपरेशन सिंदूर दरान आतंकवादी ठिकानें पर कीती गेदी कार्रवाई दे बाद पाकिस्तान नै सिविल आबादी आहले इलाकें गी निशाना बनाइयै बड़ी भारी गोलाबारी कीती ही ते तदूं केई शैल ऐसे हे जेहड़े नेई फटे। फौज आसेआ बन्ने आहले इलाकें च आम नागरिकें दी सुरक्षा जकीनी बनाने लेई इस किस्मै दे शैलें दा पता लाने ते उ'नेंगी नकारा बनाने दा इक अभियान रम्भे दा ऐ। इस सरबंध्यै च आकाशवाणी समाचार कन्नै गल्ल करदे होई किश मुकामी लोकें आखेआ

<><><><><><>

Lavender-Festival

खशबूदार बूहटें दी रड़ ते बेंगनी क्रांति गी बढ़ावा देने दी दिशा च इक बड़्डी गैंह पुट्टदे होई सी.आई.एस.आर.-ट्रिप्पल आई.एम. जम्मू आसेआ डोडा दे भद्रवाह आहले सरकारी डिग्री कॉलेज च औंदी पैहली ते 2 जून गी लवेंडर फेस्टिवल 2025 दा आयोजन कीता जाहग। इस कार्यक्रम दा उद्घाटन केन्द्री मंत्री डाक्टर जीतेन्द्र सिंह होर करडन। द' उं दिनें दे इस कार्यक्रम दे मुख आकर्षणें च कृशि स्टार्ट-अप प्रदर्शनी, लवेंडर दी खेती करने आहले करसानें ते स्टार्ट-अप्स गी सम्मानित कीता जाना, लवेंडर दी रड़ आहले खेतरें दे दौरे, तकनीकी सत्र ते होर बी मता किश शामिल होग। इस उत्सव दा मकसद लवेंडर दी खेती करने आहले करसानें गी नमिएं काहडें ते टिकाउ तौर-तरीकें दे राहें सशक्त बनाना ऐ। एह् पैहलकदमी, खिते च खशबूदार बूहटें दी रड़ ते उद्यम-कारखानादारी दे राहें करसानें दी औंदन बंधाने दे सी.एस.आई.आर. दे मिशन दा गै इक

हिससा ऐ। इस सरबंध्यै च आकाशवाणी समाचार कन्नै चेचे तौर पर गल्ल करदे होई सी.आई.एस.आर.-ट्रिप्पल आई.एम. जम्मू दे डरैक्टर ज़बीर अहमद होरें आखेआ

<><><><><><>

Viksit Krishi Sankalp

कल शुरू होआ'रदा राष्ट्रव्यापी विकसित कृषि संकल्प अभियान जेड़ा 12 जून तोड़ी जारी रौहग दे सिलसिले च शेर-ए-कश्मीर एग्रीकल्चर युनिवर्सिटी आसेआ कृषि विज्ञान केंद्र साम्बा च इक प्रेस कांफ्रेंस दा सरिस्ता कीता गेआ जेदी अध्यक्षता कृषि विज्ञान केंद्र दे अध्यक्ष डॉ. संजय खजूरिया होरें कीती। मीडिया गी संबोधित करदे होई उनें इस अभियान दे उद्देश्यें ते एहदे लेई तैयारिएं गी उजागर कीता। उनें दस्सेआ जे एहदा मकसद करसानें अंदर राई-बाई दे नमें ढंग तरीकें नमिएं काहडें ते तकनीकें बारै जागरूक बनाना ऐ जेदे च सरकारी स्कीमें बारै जानकारी, मिट्टी दे नरोएपन दी जांच, नमिएं तकनीकें दा इस्तेमाल शामिल ऐ। आकाशवाणी कन्नै इस बारै गल्ल करदे होई डॉ. संजय खजूरिया होरें आखेआ।

<><><><><><>

Magotra-Dogri Appeal

डोगरी दे नामवर साहित्यकार ते डोगरी संस्था दे प्रधान प्रो. ललित मगोत्रा होरें कल उ'नेंगी पदम श्री कन्नै सम्मानित कीते जाने पर आखेआ ऐ जे एह सम्मान उंदा नेई सब्भनें डोगरें, डोगरी भाशा ते संस्कृति दा सम्मान ऐ ते इस भाशा दी मठास गी सदा-सदा लेई जींदा रखने लेई नमीं पीढ़ी च इसी मता लोप्रिय बनाने दी मती लोड़ ऐ। आकाशवाणी समाचार जम्मू कन्नै गल्ल करदे होई उनें आखेआ।

<><><><><><>
